



KETUA PENGARAH KESIHATAN MALAYSIA
DIRECTOR GENERAL OF HEALTH MALAYSIA

Kementerian Kesihatan Malaysia,
Aras 12, Blok E7, Parcel E,
Pusat Pentadbiran Kerajaan
Persekutuan,
62590 Putrajaya

Tel :603-88832545
Faks :603-88895542
E-mail :ismailmerican@moh.gov.my

KENYATAAN AKHBAR
KETUA PENGARAH KESIHATAN MALAYSIA

SITUASI SEMASA INFLUENZA A(H1N1)
DAN TINDAKAN-TINDAKAN KEMENTERIAN KESIHATAN
MALAYSIA

4 Mei 2009

Pertubuhan Kesihatan Sedunia (WHO) dalam laporannya bertarikh 3 Mei 2009 16:00 GMT, bersamaan 3 Mei 2009 @12:00 malam Malaysia, memaklumkan di mana dua (2) buah negara lagi iaitu **Ireland** dan **Itali** telah mengesahkan kes di negara masing-masing dan menjadikan jumlah negara terlibat kepada lapan belas **(18) buah negara**. Jumlah keseluruhan kes yang dilaporkan adalah sebanyak **898 kes** dengan **20 kematian** iaitu penambahan sebanyak 240 kes berbanding hari sebelumnya.

Negara Mexico melaporkan 506 kes yang disahkan melalui ujian makmal, dengan sembilan belas (19) kematian berbanding 397 kes pada hari sebelumnya. Pertambahan kes di Mexico ini adalah hasil daripada ujian yang sedang dijalankan ke atas spesimen-spesimen terkumpul yang sudah diambil dari pesakit. Sementara Amerika Syarikat pula melaporkan 226 kes positif ujian makmal influenza A(H1N1) termasuk satu (1) kematian. Negara-negara lain yang melaporkan kes positif ujian makmal influenza A(H1N1) tetapi tiada kematian adalah seperti berikut: Austria (1 kes), Kanada (85 kes),

Hong Kong (1 kes), Costa Rica (1 kes), Denmark (1 kes), Perancis (2 kes), Jerman (8 kes), Ireland (1 kes), Israel (3 kes), Itali (1), Belanda (1 kes), New Zealand (4 kes), Republik Korea (1 kes), Sepanyol (40 kes), Switzerland (1 kes) dan United Kingdom (15 kes).

WHO masih lagi mengekalkan tahap amaran Influenza Pandemik di Fasa 5, semenjak 29 April 2009 dan TIDAK menyarankan sebarang tindakan sekatan dari segi kesihatan, perjalanan dan perdagangan serta penutupan sempadan yang perlu dilakukan oleh mana-mana negara bagi perlindungan kesihatan antarabangsa. Namun begitu telah menasihati orang awam yang mengalami tanda-tanda jangkitan terutamanya demam, batuk, selsema dan sakit tekak dinasihatkan untuk menangguhkan lawatan antarabangsa dan mereka yang mengalami tanda-tanda berkenaan semasa melakukan lawatan antarabangsa dinasihatkan untuk mendapat rawatan.

Beberapa saranan tambahan daripada WHO meliputi amaran kebersihan diri terutama sekali membasuh tangan dengan kerap menggunakan sabun dan air, lebih-lebih lagi selepas batuk dan sekiranya mengalami gejala '*influenza-like illness*', sila dapatkan rawatan perubatan dengan segera. Disamping itu, tiada risiko mendapat jangkitan influenza A(H1N1) sekiranya daging atau produk babi disediakan dan dimasak secara betul.

Pada 3 Mei 2009 Bilik CPRC Kementerian tidak menerima sebarang laporan mengenai pesakit yang dimasukkan ke wad isolasi bagi tujuan siasatan dan pemerhatian. Semua kes dibawah pemerhatian juga telah didiscaj dari hospital. Dengan ini, sehingga kini **tiada kes** influenza A(H1N1) dikesan di negara kita.

Saringan kesihatan di semua pintu masuk antarabangsa yang menerima kemasukan pelawat dari negara-negara yang dilanda wabak influenza A(H1N1) serta kepulangan rakyat Malaysia dari negara tersebut terus dipertingkatkan di mana mereka disaring dan diberi *Health Declaration Form* dan *Health Alert Card*. Pihak imigresen telah membantu pihak Kementerian Kesihatan Malaysia dalam proses saringan penumpang ini. Pada 3 Mei 2009, status aktiviti saringan pemantauan influenza A(H1N1) di pintu masuk negara iaitu termasuk di Lapangan Terbang Antarabangsa Sepang adalah seperti berikut:

- Bilangan penerbangan yang disaring : 42
- Bilangan penumpang yang disaring: 4,452
- Bilangan dirujuk ke hospital: tiada

Sehubungan dengan ini juga, mereka-mereka yang baru balik dari luar negara terutama dari negara yang dikesan mempunyai kes influenza A(H1N1) diminta untuk membuat pemeriksaan sendiri dan sekiranya mempunyai tanda-tanda demam, batuk atau tanda-tanda jangkitan salur pernafasan, mereka diminta mendapat rawatan segera di klinik yang berdekatan. Mereka yang kurang sihat dinasihatkan untuk menunda perjalanan ke negara yang terbabit sekiranya boleh.

Saya bagi pihak Kementerian Kesihatan juga ingin merakam setinggi-tinggi penghargaan dan terima kasih kepada Kementerian Penerangan, Komunikasi dan Kebudayaan serta pihak media di atas kerjasama yang diberikan untuk memaklumkan situasi serta pendidikan kesihatan mengenai wabak influenza A(H1N1) kepada orang ramai.

Kementerian Kesihatan Malaysia dan semua agensi terlibat terus meningkatkan pemantauan situasi influenza A(H1N1) dengan pihak

WHO bagi memastikan tindakan-tindakan proaktif diambil untuk melindungi kesihatan awam penduduk Malaysia.

Sekian dan terima kasih.

TAN SRI DATO' SERI DR. HAJI MOHD ISMAIL MERICAN
Ketua Pengarah Kesihatan Malaysia

Tarikh: 4 Mei 2009